

唐  
文  
拾  
遺

唐文拾遺卷之十四

榮祿大夫三品頂戴前少巡廣東高廉道加四級臣陸心源輯  
李百藥

全唐文一百四十二有傳

洛州都督竇軌碑銘

并序

蓋聞補天立極大聖於是勃興政亂朝昏名臣以之  
陳力步驟之跡旣弘經綸之會斯在固雷風通響成  
其化者立功韶濩錯音應其時者人傑公諱軌字士  
則扶風平陵受終若帝之初大啓鴻業中興復禹之  
績因生命氏廣國追讓之風聲高外戚安豐功烈之

美義正中台爰暨皇唐始於盛漢門威靈貺母儀天下是故昭章圖牒冠冕摺神經文緯武之才照重光於百代幢鍾列鼎之盛流餘慶於千祀十二葉祖統雁門大守大將軍武之從子也武以大功不遂爲閹官所誅統避難亡奔出塞代爲南部大人威振華夏七葉祖羽爲魏太尉遼東京公屬魏氏中微愍攝朝政竭忠貞以安社稷挾幼主而令姦雄曾祖略征北大將軍太保雍州牧柱國建昌孝公德高禮緝鬱爲帝師清徽素範坐鎮雅俗祖熾魏侍中周太宗伯隨太傅雍州牧上柱國鄧恭公以蓋俗之姿運如神之神之

智道尊三代義盡一心父某周大宮伯襄州亳州惣  
管上柱國鄴國公挺將相之門懷棟梁之器位因功  
顯名以實高公藉繁祉之資稟英靈之祚感白雲而  
諧庶績受璜玉而秘兵鈴幼樹風神夙標名節志尙  
宏遠獨秀人倫期管樂於老成望韓彭於兒戲軼雲  
羅於沮澤追電駕於當途隨仁壽中以獻皇后挽郎  
授朝請郎遷資陽郡東曹掾苞湘納漢始涓澮於濫  
觴蔽日干霄尙峙傾於覆簣氣憤風雲之際情察天  
人之理石立之祥斯兆土崩之義有徵公家卽塗山  
烟連渭汭想白狐之慶義屬過門望黃鳥之旗預欣

同德及星屯秦井電奄商郊軍次蒲城便仗劍請謁  
太上皇見公大悅言及平生備獻誠款雖盧綰之出  
入臥內鄧禹之止宿禁中不能過也命公爲渭南道  
大使招撫得以便宜從事取永豐之粟甚漢卒之食  
敖倉下華陰諸縣同周師之據脩武既有宿飽之資  
仍成楹喉之業以功授金紫光祿大夫封贊皇縣公  
又召募英勇五萬餘人從入京師翊成大業揚州精  
甲未足擬儀薊市耶榆曾何等及兵臨九地氣竭百  
樓以公爲東面大將于時四夷雲合萬里風行彭濮  
比肩樊灌接踵皆公麾下止預偏裨任寄之重罕有

其二平城之日功實先登進授光祿大夫卽上柱國也仍除大丞相府諮議參軍事軍諮祭酒此卽其人霸府洞開首膺高選尋而稽胡侵軼將逼近畿公乃推轂專征大破凶黨復令公乘勝長驅討薛舉殘猾武德元年拜太子詹事愬司之要任協官端才地之華允茲時望尋遷使持節愬管隴右諸軍事秦州刺史帶秦州道行軍元帥秦隴形勝控馭遐遠雖地接京畿而人多異類西戎卽序之地尙餘榛梗北狄背義之徒時警烽候愬以司牧寄之分閫事兼文武惟公是屬於是翦寇虐以威刑愬風俗以平典寬猛相

濟化成朞月某年進封鄴國公食邑通前三千戶二年以卬夔初平命公持節巡省以爲隴蜀道安撫大使三年拜益州道行臺尙書左僕射擬跡文昌儀刑端右此之舉也特異常倫仍以行臺兵從平伊洛然神旗所指事切來蘇芻牧之勞尙資心力公處帷幄之內在行陣之間運籌執銳功冠諸部四年平王充擒竇建德仍陪旌節獻捷京師凱樂之辰五將同列元帥居首是惟聖上榮寵之盛今古未聞七年廢行臺省仍權檢校益州大都督九年朝廷大論義旗已來有大功於王室者並食眞邑公於是別賜益州封

戶書社六百家貞觀初拜使持節大都督益綿嘉邛  
陵雅簡眉八州鵞南會寧三郡諸軍事益州刺史公  
自杖節華陽綿歷時序懷荒撫衆之勤定筌存耶之  
効固以夜郎款徼昆彌率俾非假諭蜀之文寧勞度  
據之役俘馘之衆每獻廟廷賓賦之多充仞王府列  
公益國不可勝言自秦昭平蜀歷茲永久或班條刺  
舉或部符其化竊比明德彼用多慙王襄樂職之篇  
蓋爲小技王尊叱馭之舉非曰大忠文翁之脩學校  
纔方進誘李冰之斃江神多慙義烈自餘眇小夫何  
足言尋入爲右衛大將軍加左光祿大夫文昌上將

列位天遊軒禁鈞陳擬儀震象惟公居之隱如敵國  
二年拜使持節行都督洛鄭伊懷四州諸軍事洛州  
刺史左光祿大夫如故陰陽交會之所山川作故之  
都先王以之卜食今上於焉分陝居此地也竇簡帝  
心公道在公平義惟正直開物闡化急病讓夷訓五  
方繁雜之毗化三川機巧之俗源清流急風行草偃  
四年以疾薨於館舍春秋若干五年葬於某所謚曰  
某公禮也惟公始於立身終於行道操履端肅志尙  
清明未爲顯晦易情不以風霜變節神用成九德之  
基天經爲百行之本早昇庠序遍觀流略旣韞從橫

之志便輕俎豆之容數爲梁父之吟每動崇丘之嘯  
王濬問巷軒蓋有期陳蕃虛室閒居未掃觀象察變  
窮數知來嘗觀赤伏之符且識黃神之命屬唐郊授  
手大濟生靈匪止姻連帝家固以才膺王佐潛德之  
友本以雞酒相期利見之辰還成魚水相得言行計  
用未藉三略之書戰勝攻取自有萬夫之敵故能動  
合神心畢符冥契收鯨鯢若摧朽拉犀象如拾遺權  
節臨藩捍城之道斯極分麾鞠旅方面之績居多功  
若丘山屢形中旨心如金石且降王言而臨軍用兵  
蒞官行政以爲不言之教藉震曜以爲威大道旣乖

非仁慈之可化純以儒術漢帝謂之亂家先以刑書  
鄭相以之理國中興之道云盛遺愛之德猶存是以  
奉之以律令申之以檟楚侯嚴霜而厲威則飄風以  
疾惡至於舊交密戚彌行直道雖苟晞之忍對從母  
蘇章之暫禮故人無以喻也亦由至察其簡易相背  
強斷與隋直相成故醜正之徒或傳口謗盜憎之訟  
時聞旒展爰自貞觀俗易時移太平之化伊始刑措  
之風愈治公望表知裏在變能通協聖主之心遵上  
皇之治導德齊禮有恥且格自非惟幾以成務其能  
與於是乎其拙慎守道厲精勤事求之古人未易遇

也固以重南容之三復惜陶侃之分陰及逝疾彌留  
至於大漸每發中使屢遣太醫因問至京廢朝軫悼  
詔葬之儀以極賙贈之制有加夫立德計功垂範貽  
則可以銘太常而書王府鏤金石而被管絃在當年  
而無媿厯永代而不朽者惟公平故吏某官姓名等  
想生氣其猶存痛徽音之永謝式昭盛業樹碑神道  
嗣子某等克構丕基早標令譽怵惕霜露欲報之志  
無從匍匐几筵誅德之情斯切銜哀見託乃述銘曰  
炎光浸隱命厯斯窮滔天塞霧振海飛風皇靈膺錄  
大濟神功龍興晉野電照秦中灼灼英武人之先覺

才應時須神生靈岳始離襁褓將遊黌學已寤深沉  
俄觀卓犖乘機去亂杖義來蘇珣戈振旅玉帳陳謨  
將屠豕鹿且塞飛狐情深寇鄧慶叶微盧旣入商郊  
仍開軹道高邑攀鱗靈壇薦寶每奉王命遂行天討  
拾益如遺僊秦猶草水鬪王城神開伊闕策預玄女  
功參黃鉞告廟飲至循牆稱伐一厠等夷芬芳無歇  
河洛帝里岷峨襟帶畢綜樞機常司要害始遇天造  
終逢時泰間以韋弦動攝羣會南山獻壽北里呈祥  
將陪東狩遽落西光羣物不殀彼獨殲良哀纏土庶  
痛結早蒼冥漠人理生平華屋初笑後號始哥終哭

烏奕鍾鼎歲蕤簡牘方託辰精徒嗟梁木

文館詞林  
四百五十

九

葭州都督黃君漢碑銘

并序

蓋聞龍騰鳳舉聖人德合上天附翼攀鱗名臣道符  
興運然濟人活國非止獨見之明保大定功必藉羣  
才之力大唐乘乾御歷奄宅區夏圖錄草昧之辰旌  
旗卷舒之際風雲所感文武兼資得孫吳之秘策爲  
韓彭之稱首其唯都督號國公者焉公諱君漢字景  
雲東郡胙城人也皐陶伯益邁種之德無窮太尉司  
徒重光之慶彌遠自晉宅淮海代仕丹楊六葉祖琨

與王玄謨同趣滑臺仍爲東郡太守故自江夏徙焉  
長江上膺井絡惣百谷而會萬川靈河氣積咸池孕  
驪珠而開龍匣故能舍英發秀載挺異人烏奕三古  
昭章百代曾祖顥魏散騎侍郎平昌郡太守金珥之  
華實符令望銀章之重式允具瞻祖崇太中大夫器  
守深邃風調高簡中庸履道上庠待問父剝卷懷丘  
壑養志琴書屬天將弃齊政荒人散蚍豕薦食彭徐  
危殆君投袂發憤情深批患乃召募鄉人表請式遏  
敕授鄉豪大都督及本朝傾覆仍從偃仰旣而尉迴  
稱兵保全州國仍惣督士馬出赴汴州公義承庭訓

慶藉緒餘持名教以立身錯黼藻而成性年甫弱冠耿  
介不羣指黃閣以載懷望青雲而孤竦豹略龍韜之  
旨因心以悟背山面水之術盡地成圖蹈義之方屬  
熊掌而不厭趨角之力顧龍文而以輕匕手截交忘  
歸飲羽斃江神而憤壯氣貫月魄而運冥功隨煬帝  
驅役中夏遠征遼溟鄉閭首望咸遣募人公義不獲  
已僣俛從事雖師徒覆敗猶以先登獲賞授立信尉  
本州勅置軍府選補越騎校尉仍爲本府司馬旣而  
大業數窮朝危國蹙公深歎橫流方期義舉招輯忠  
勇且觀時變李密據茲勝地振彼洪飈力拔嵩華志

傾龜鼎公言思禍始擁衆策名授上柱國河內惣管  
封汾陰公仍據守柏崖委以并吞河朔然同軌之謀  
已留東井翦商之衆且定西秦公察變知來雖懷先  
覺感思戀舊未忍推亡及魏公喪律方効誠欸竇融  
之河右言歸劉琮之荊州內向弗之尙焉詔除上柱  
國使持節惣管懷州諸軍事懷州刺史封東郡開國  
公食邑三千戶寶建德鴟張河朔王充狼戾伊瀆絕  
地爲妖滔天肆虐柏崖山河表裏密邇寇讎跨太行  
之險撫崇邱之背是以不移舊政用逼凶醜賊徒嫁  
禍指期吞噬始則甘言厚幣以恠亂神終乃窮兵黷

武若卵投石以同心同德之衆藉百戰百勝之威僞  
將每擒連城必下雲飛銅爵電照金墉辨亡國必敗  
之徵奪凶魁將死之魄以功拜使持節惣管懷陟恭  
西濟四州諸軍事懷州刺史封號國公食邑三千戶  
公自獻款聖朝未蒙利見必馳象魏表請來庭太上  
皇以氛祲未靖方資經略間不容髮用惜分陰乃降  
璽書未允情願仍謂羣臣曰號公誠績昭着朕思見  
其人宜遣畫工圖厥容象昔鄧禹雲臺霍光麟閣身  
歿之後方飾丹青豈比皇德念功意存容質遂以生  
年用章儀範眇尋前載罕見其倫足以高邁前脩傳

芳來萊皇上親馭一戎將傾九地勅公惣斯驍銳扈  
從神麾於是靖洛鬪而受圖書暨河朔而弘聲教飲  
至廟庭大弘勲典賞延于嗣禮秩斯隆旣而東魯妖  
氛塵飛崇岱北趙餘孽氣積旄頭陪從戎旃言誅後  
服爪牙之用情寄斯重首虜之多功無與貳江湖潛  
沸楊越作梗別惣師律以振皇威盡巢穴致前茅之  
功自淮肥成破竹之効軍還除使持節都督潞澤蓋  
韓遼五州諸軍事潞州刺史唐晉之郊用禮舊俗韓  
趙之際舊戰國餘風喪亂之後人凋俗弊冠冕同裂  
文章咸蕩公以□□□厥心靈以墳典開其耳目奉

聖皇之訓比屋可封感邦后之明有教無類及黠虜  
內侵邊烽夜警鼎飛則神器無守口網漏而羣凶競  
逐人靈之貴涉血履腸地載之厚爪分鬻切大君有  
作甯濟區夏七十二戰于戈廿八將咸膺星象公望  
仁義而歸往隨謳歌以欣戴運此謀猷奮斯靈武義  
兼追楚之騎實與戡黎之功或任切中權或寄深麾  
下或侍言樽俎或式清宮禁雖玄女祕術必剪鯨鯢  
赤伏神符自奔犀象而皇情乃眷策府書勳懋德懋  
功可久可大軼丘山而慶賞盡帶礪於無窮乃出惣  
兵機外撫方鎮旣弘車服之錫還資侯伯之重行太

平之化撫思父之眊鳥獸於是歸仁蠻夷以之革面  
荒徼之外種落實繁不識君臣莫知正朔公申以文  
德示以堯心汎海梯山夜郎內歎觀風侯海朝飛重  
譯方前驅輦道受記明庭參駕鑿輿告成日觀而彼  
蒼寡惠與善愆期沉痾彌留晦時愈積眷言神道禍  
福之塗終昧並走羣望眊史之誠無感粵以貞觀六  
年薨於州館春秋五十有二城府闐寂風雲悽慘營  
柳翳以銷亡棠陰颯而搖落哀纏野祭痛結眊謠庶  
遺愛之長存恨百身之不贖輜櫓夙啓靈舟歸帆攀  
帷噎水號慕盈塗非關巫峽之猿豈止友江之獸粵

以七年十一月還葬於本邑之舊塋皇情軫悼賙贈  
加等太常考行諡曰某公嗣子騎都尉河壽第二子  
騎都尉河上並氣調標舉器幹夙成立德之方終期  
永錫揚名之美允屬孝思至性通神叶歸鄉之夢大  
龜襲吉奉安宅之圖故吏某官姓名等痛徽猷之永  
遠懼陵谷之遷貿乃傳芳金石式昭不朽迺爲銘曰  
周氏彭濮漢室吳英並云列土各控強兵竟隨同德  
並擅高名於惟上將實惣連城弘宣義烈翼贊休明  
家積祉祉門多卿相始自江干聿來河上昌平溫雅  
大夫貞亮曰父之靈惟人之望奕載其德我承靈貺

眈眈英盼赳赳雄姿唐生問相太卜開龜永懷廟食  
獨照軍諮寶銘北虜羿繳東夷遺跡是慕餘風可追  
國步屯圯時艱孔棘絕地羣飛經天薄蝕受圖鷹運  
乘乾立極大濟生靈載清區域震風效響時英肆力  
將軍挺秀承風扇威縱鱗獨運撫翼橫飛常陪秘策  
必從戎衣窮神觀化察變知微山河命賞車服增暉  
旣戢兵權用求人瘼家肥物阜推厚居薄報德迴龜  
申冤鳴鶴多見不忍誰云主諾惟國之楨惟人之鐸  
循虛警節移望虧輪浮生怛化閱水歸真高明至此  
景福誰親泉宮永夕松路非春千年生氣萬古芳塵

上同

荊州都督劉瞻碑銘 并序

昔西都佐命罕聞風烈之餘東漢功臣鮮預公卿之  
任以帝王之胄隨騰嘯之舉出居侯伯之重入處丹  
青之地樹鴻勳於草昧敷文教於彝倫見於武陵劉  
公者矣公諱瞻字道洽彭城綏輿里人也今僑居亳  
州之鹿邑縣自彤雲啓命光宅域中繁衍之祚無窮  
克昌之道斯盛固以分華若木疏派咸池參良極以  
高驪振江河以長邁曾祖方譽魏長社縣令祖英信  
潁川太守譬仲弓之弘道下邑慶屬後昆卽細侯之

布政近畿福流京縣父立寂州主簿得性一丘忘懷  
三徑始遊塵俗終逸江海公藉慶承寵含和稟秀長  
虹吐閭奔電增輝靈府之中高懸明月姿儀之表近  
照澄流爰自幼年遠標風尚始遊黌塾聞戒露於九  
臯將騁康衢躡遺風於千里言從賓貢利用王庭雖  
禮秩未弘而聲猷藉甚自永州行佐徵授雍州萬年  
縣丞隨大業之末頻攝行華陰鄠涇陽鰲屋三原武  
功諸縣事是時賦重役煩政荒人散厯試諸縣蓋有  
由焉考績獨高優陟宜遠勅除太原縣長神惟改口  
天將悔禍獨夫之怨旣深撫我之情逾切公仰觀垂

象俯慨橫流哀時命之未申痛人靈之孔棘方成縱  
壑之資自感登山之夢盡變通之術進從橫之圖運  
韜略於樞機煽風雲於懷抱義旗初建授正議大夫  
太上皇開大將軍府以公爲諮議參軍事斯固公達  
處軍諮之地奉孝成大業之辰豈止孫盛賀循從容  
府朝而已聖上別愬輕銳出定西河令公權攝行軍  
長史西河平進授銀青光祿大夫仍留公檢校西河  
都通守得便宜從事仍令催督軍糧招集士馬吳起  
作守未固河山干木遺風猶多節槩公導之以期運  
示之以幾微於是投袂爭先贏糧景從非期而會不

下萬人武德元年以西河爲涪州授公刺史九月進  
位大將軍封武陵郡開國公食邑二千戶西河始屬  
亂離人情未一自公安撫咸悅來蘇妖賊劉武周間  
左叛徒挺禍汾晉雖謳歌有奉而窮奇未革同惡相  
濟醜類實繁連結百城從橫千里駢率犬羊盡銳攻  
逼重以并州失守人情惶懼雲梯地道氣盡百樓亭  
妾易子糧無半菽公懷此精誠厲斯忠義非唯舉刃  
指虜重圍洞開足使拔劍揮泉飛流自湧士感恩惠  
以死爲期或刎頸自明或焚妻取信諸將敗衄多見  
奔投因公獲濟則有人矣孤城絕援綿歷三年內安

外拒心力俱竭聖上掃清雰祲方得保全進位上柱國仍除太府卿以旌功伐也公貞固以濟時清明以膺務理繁而不紊處劇而行簡氣序纔移大標聲譽五年拜襄州道行臺兵部尙書仍持節山南道巡撫大使戎事之大分職文昌旌節所履載光原隰又以本官檢校襄州都督襄州刺史尋除司農卿帝命四子敬授人時農曰八政實惟國本選衆而舉能官攸屬倉廩旣實禮教斯弘八年以趙王爲安州大都督又以本官檢校安州大都督府長史又權檢校荊州大都督府長史其年又檢校襄州都督貞觀二年又

檢校荊州都督五年詔除使持節都督荊硤岳朗澧  
東松六州諸軍事荊州刺史周稱九命作伯漢云六  
條刺舉分職設官輕重或異導禮齊德損益同歸昔  
杜元凱以經國宏才忽司南服爰自樊漢遷督荊郢  
以今望古比迹爲鄰其撫有蠻夷弘宣王化豈釋沮  
漳之令典將盡周邵之遺風焉而賁亮之道未申夭  
壽之期俄畢促生靈於厚夕掩昭代於重泉以年月  
日薨於府舍春秋若干粵以其年月日葬於某所諡  
曰某公禮也惟公風力宏遠英姿秀發少多大志卓  
犖不羣圖鶴列於撫塵肆龍吟於狹室陳平間巷車

馬每遊王濬門庭旛旗斯在時有未遇道或可懷屈  
壯志於膝序挫雄心於俎豆俯仰之節自合威儀造  
次之間動成規矩文籍滿腹曾無蹉駁之譏珪璋閎  
色寧有多藏之患以義利人以仁求己貴不易交貧  
而好施顧惟百行深懼四知廉足激貪儉多逾禮霜  
霰凝而莫改風雨晦而不息始見漸陸之姿俄縱垂  
天之羽附日月而起沛庭履立黃而翦商邑霸朝諷  
諫豈止中涓之勤西河守禦寧唯冀城之固再登九  
列任隆望重高缺□分宇承天之龍爲國之楨□□  
農政爰司玉府叶贊九功兼資億庾惟彼荆衡作固

作鎮形勝所屬道風逾峻江漢澄清琨瑤比閭黃閣  
未丹雲貽器釁庸矣國楨傷哉梁木捐耒釋耜塗吟  
巷奧鄢郢故墟江山極目清暉素範蘭芬桂馥藩牧  
寮采友執通賢共懷遺愛同嗟小年至情枯柏大署  
開阡豐碑永祀盛德方傳

同上

干志甯

全唐文一百四十四有傳

宏農府君當遷不諱奏

依禮舍故而諱新故謂親盡之祖今皇祖宏農府君

神主當遷請依禮不諱

唐會要  
二十三

隨柱國左光祿大夫弘義明公皇甫府君之碑  
夫素秋肅煞勁草標於疾風叔世艱虞忠臣彰於赴  
難銜須授命結纓殉國英聲煥乎記牒徽烈著於旂  
常豈若疊起蕭牆禍生蕃翰踰七國勢重三監其  
有蹈水火而不辭臨鋒刃而莫顧激清風於後葉抗  
名節於當時者見之弘義明公矣君諱誕字立憲安  
定朝邠人也昔立効長丘樹績東郡太尉裂壤於槐  
里司徒胙土於邳門是以車服旌其器能茅社表其  
勳德銘功衛鼎騰美晉鍾盛族冠於國高華宗邁於  
樂卻備在史牒可略言焉曾祖重華使持節龍驤將

軍梁州刺史潤木暉山方重價於趙璧媚川照闕曜  
奇采於隨珠祖和雍州贊治贈使持節散騎常侍車  
騎大將軍儀同三司膠涇二州刺史高衢將騁遠天  
追風之足扶搖始搏早墜垂天之羽父璠使持節驃  
騎大將軍開府儀同三司隨州刺史長樂恭侯橫劍  
桂枿威重冠軍枿瑞蕃條聲高渤海公量匄申伯稟  
嵩山之秀氣材兼蕭相降昴緯之淑精據德依仁居  
貞體道含章表質詎待變於朱藍恭孝爲基寧取訓  
於橋梓鋒剗犀象百練挺於昆吾翼掩鴛鴻九萬奮  
於溟海博韜骨產文瞻卿雲孝窮溫情之方忠盡匡

救之道同何充之器局被重晉君類荀攸之宏圖見  
知魏主斯故巨羅眾藝囊括羣英者也起家除周畢  
王府長史榮名蕃牧則位重首寮衮服睢陽則譽光  
上客旣而蒼精委馭炎運啓圖作貳邊服實資令望  
授廣州長史悅近來遠變輕詵於雕題伐叛懷柔漸  
消化於緩耳蜀王地處維城寄深磐石建旗玉壘作  
鎮銅梁妙擇奇才以爲僚佐授公益州總管府司法  
昔梁孝開國首辟鄆陽燕昭建邦肇徵郭隗故得馳  
令問於碣館播芳猷於平臺以古方今彼此一也尋  
除尚書比部侍郎轉刑部侍郎超步紫庭光映朝列

折旋丹地譽重周行俄遷治書侍御史彈違糾慝時  
絕權豪霜簡直繩俗寢貪競隨文帝求衣待旦志在  
恤刑呪網泣辜情存緩獄授大理少卿公巨細必察  
同張季之聽理寬猛相濟比于公之無冤但禮闈務  
殷樞轄寄重允膺此職實難其人授尙書右丞洞明  
政術深曉治方臧否自分條目咸理丁母憂去職哀  
慟里閭隣人爲之罷社悲感衢路行客以之輟歌孝  
德則師範彝倫精誠則貫徹幽顯雖高曾之至性何  
以加焉尋詔奪情復其舊任于時山東之地俗昇民  
澆雖預編民未行聲教詔公持節爲河北河南道安

撫大使仍賜米五百石絹五百匹公輶軒布政美冠  
皇華之篇擁節觀風榮甚繡衣之使事訖反命授尙  
書左丞然并州地處參墟城臨晉水作固同於西蜀  
設險類於東秦實山河之要衝信蕃服之襟帶授公  
并州總管府司馬加儀同三司公贊務大邦聲名藉  
甚精民感化黠吏畏威屬文帝劍璽空留鑾蹕莫反  
楊諒率太原之甲擁河朔之兵方叔段之作亂京城  
同州吁之挺禍濮上雖無當璧之地乃懷奪宗之心  
公備說安危具陳逆順翻納魏勃之榮反被王悍之  
災仁壽四年九月溘從運往春秋五十有一萬機起

藏良之歎百辟興喪予之悲切孔氏之山頽痛楊君  
之棟折贈柱國左光祿大夫封弼義郡公食邑五千  
戶謚曰明公禮也喪事所須隨由資給賜帛五千段  
粟三千石惟公溫潤成性夙表白虹之珍黼黻爲文  
幼挺雕龍之采行已窮於六本蘊德已於四科延閣  
曲臺之奇書鴻都石渠之祕說莫不尋其枝葉踐其  
隩隅譬越箭達犀飾之以括羽楚金切玉加之以磨  
礪救乏回於指困親識待其舉火進賢方於推轂知  
已俟以彈冠存信捨原黃金賤於然諾忘身殉難性  
命輕於鴻毛齊大小於沖襟混寵辱於靈府可謂楷

模雅俗冠冕時雄者也方當亮采泰階參綜樞務豈  
謂世逢多故運屬道消未展經邦之謀奄鍾非命之  
酷世子民部尙書上柱國滑國公無逸以爲邢山之  
下莫識祭仲之墳平陵之東誰知子孟之墓乃雕戈  
勒石騰實飛聲樹之康衢永表芳烈庶葛亮之隴鍾  
生禁之以樵蘇賈逵之碑魏君歎之以不朽乃爲銘  
曰

殷后華宗名卿胄系人物代德衣冠重世逢時翼主  
膺期佐帝運榮經綸執鈞匡濟門承積慶世挺偉人  
夜光愧寶朝采慙珍雲中比陸日下方荀抑揚元輔

參贊機鈞玉葉東封貳圖北啓伏奏青蒲曳裾朱邸  
名馳碣石聲高建禮珥筆憲臺握蘭文陛分星裂土  
建侯開國輔藉正人相資懿德中臺輟務晉陽就職  
望重府朝譽聞宸極亂階蕚草災生剪桐成師構難  
太叔興戎建德効節夷吾盡忠命屯道著身歿名隆  
牛亭始卜馬藹初封翠碑刻鳳丹旆圖龍煙橫古樹  
雲鎖喬松敬銘盛德永播笙鏞

案此碑據北宋拓全文錄

歐陽詢

全唐文一百四十六有傳

大唐故特進尚書右僕射上柱國溫公墓誌

公諱彥博字大臨□□太原祈人也其先分土于晉  
勤王□□□□書社於溫廼□□於韓魏□其鴻□載德  
流其茂祉是以魏晉伊□曷基馳襲黃之□□□多  
故太真□□□之績永言盛烈可勝言哉祖裕魏太  
中大夫澄波萬頃竦巖千仞屈迹中缺十皇朝贈魏  
州諸軍事魏州刺史文爲德表範爲士則榮被陶泉  
芳流愔史公陶皇靈之正氣體生民之上姿因心而  
齊曾閔抗迹而偶揚墨行之所踐比一鄉而靡貴言  
之所應踰千年其如響下帷縱志舍□擅奇採學肆

之珠玉價倍梁楚伐翰林之杞梓材高廊廟臨川永  
歎望古遐想譏沮溺之長勤陋晏管之庶績是以屈  
已成務之規肇於傅巖之下經國應變之術得於圯  
橋之上豈唯馬況清□陽之器小桓彝□叔通鑒稱季  
野之名高而已哉隨開皇中有詔舉士公首應嘉招  
以對榮高第□□省尋除通事舍人數納青蒲雍  
容丹陛冕旒悅其□旨摺紳美其風標以艱憂去官  
俄奪情起復舊職屬煬帝巡歷六合征伐八荒鷹揚  
之將載馳鳳舉之使結□公伏軾遼左則夷貊革心  
張□薊北則姦宄改過亦如傅介之斬樓蘭果勝之

靜勃海也既而火運告謝天厯有歸下車而弘大道  
當辰而隆至治兆發螭龍軼有周之得土賞窮帶礪  
邁炎漢之疇庸乃授公上柱國幽州總管府長史封  
西河郡開國公食邑二千戶徵爲中書舍人遷侍郎  
昔士季智謀無聞德行之美孟陽辭藻非有政事之  
才兼之者公也久之出爲行軍長史屬胡騎蟻集穹  
廬蜩起合圍過於百重在危倖於七日類回溪之垂  
翅若穀陵之喪師張拳大澤恥懷少卿之志茹毛窮  
海終全子卿之節聖上不承景業惟新寶命求衣切  
於中夜思治勞於日昃徵隨會於秦國將寄鹽梅召

張裔於吳朝方資啓沃□乘獲反馳燕越之高衢和  
璧既歸增秦趙之重價除雍州治中檢校尚書吏部  
侍郎未幾復爲中書侍郎遷御史大夫□□□□  
□上庶寮哀慟於下雖魏惜景興晉悲子若不是過  
焉勅遣民部尚書莒國□唐儉尚書工部侍郎盧義恭  
監護喪事又遣銀青光祿大夫行中書侍郎杜正倫  
持節弔祭又賜以祕器及塋地一區并立碑記德行  
前後賻贈二千喪葬所須並令官給詔遣尚書禮部  
侍郎令狐德棻水部郎中□文紀持節冊贈特進謚曰  
恭公禮也粵以其年十月廿二日陪葬於昭陵側之

東所悲哉逝水□矣夜臺懼岸谷之或遷懷金石之  
可久式昭盛德永播遺音其詞曰

江之永矣發自長源族之茂矣肇自高門挺金帝宅  
拾芥禮園世祿不朽德音若存猗歟令範鑑銷□韻  
資孝爲忠移友於信如彼琬琰照庶流潤如彼驥驥  
籊雲表駿爰初仕進莫展風力若鴻斯磐如鸞集棘  
雖居下位逶迤退食雖在亂朝好是正直河圖表瑞  
捧日高驤提衡庠績執法銘常近追辭第遠慕循牆  
循牆伊何鳴謙是則辭第伊何克已表德彝章有序  
徽音允塞方齊召南遽侔魯北秦殞奄息百身靡期

晉且士會九京是思美矣遺烈眇若其時宸居震悼  
庶□漣洏輾輾超忽太華迢遰□背洛浦□臨渭汭  
望盡□川悲生容衛空餘□□騰芳億載銀青光祿  
大夫歐陽詢並書

石按御史大夫下有缺

女子蘇玉華墓志銘

女子玉華蓋洗馬蘇君之季女也夫其瑤姿外照蕙  
性內芳體備幽閒動合禮則旣嫻習於圖史且留連  
於音律以故名靄蘭閨聲綿梓里夫何美質降年不  
永竟致天歿春秋十有五焉以大唐武德二年五月  
九日終於居德里之第卽以其月之廿有五日葬之

於京兆之神和原悲歟天乎不臧曾靡降福□道何  
昧竟貽斯殃諒豈有違芳齡永逝悼以長往終天無  
替嗚呼哀哉迺爲銘其墓銘曰

玉碎兮珠焚風悲兮日曛問天兮無言永絕兮音塵  
善可紀兮慧絕倫嚴霜降兮值芳春丹旄飛兮淚霑  
巾千秋萬世兮哀無垠

石刻

車駕帖

車駕取四日迴京東宮以吾從秋來重困氣體疲頓  
甚垂惻隱蒙道勞問別給飡酒奉賤通謝手令優答惶  
恐欣勞豈任誠素弟恨此身已老盡忠所事特有平

庄之心耳惠子知我茲故云云賢淑並安佳詢再拜  
帖汝

足下帖

足下何嘗定返還人望□心曲永嘉書處定難以爲  
其心也

比年帖

比年守疾病無事絕心氣至於書處焉並昔時旣言  
必求然顯數字豈能備矣須將示之十五日歐陽詢

腳氣帖

吾自腳氣數發動竟未聽許此情何堪寄藥猶可得

也並消化  
閣帖

唐文拾遺卷之十五

榮祿大夫三品頂戴前分巡廣東高廉道加四級 陸心源輯

褚亮

全唐文一百四十七有傳

隨右驍衛將軍上官政碑銘

并序

若夫楚都爲寶兼瓊於是爲貴梁國攸珍明珠以之  
非重賢臣者爲政之樞機佐時之棟宇鷺鳥累百無  
由搏擊之功良馬日干乃見康衢之力至於勳書紀  
狀業著司庸存公立事之臣沒稱遺愛之美則上官  
使君具有焉公諱政字匡濟京兆山縣人也其先惟

德受氏因官賜姓青史孤其長源丹契傳其遠葉子  
蘭楚國之大夫桑樂淹家之令望自此蘭芬桂馥玉  
閨金英軒冕相繼賢才爲伍九代卿族旣已慙華七  
葉珥貂信其殊寵王父△魏使持節大行臺原州刺  
史布教文昌之宮儀形列岳之選功宣彝鼎道冠生  
靈父△周使持節大將軍△州刺史象賢以德受爵  
惟仁盛業存汗竹之書餘風表甘棠之惠公以承基  
緒早播聲芳協膺運之雄姿爰誕靈而秀出咬馭奇  
節昂昂異□雅性與江海同深英風隨寥廓共遠孝  
友之行道高於縉紳退讓之心譽結於鄉黨技殫劒

史學兼韜策孫子短長之術魏君接要之書巧射匹  
於陽元善騎同於武子縱情儒業遊藝翰林蹈道必  
於仁厚結交崇其信義弱冠登朝修名獨遠天和元  
年召爲右侍上士其年月改授折衝上士于時王業  
肇基霸圖將構妙求賢傑允屬勳庸公劬勞草昧竭  
盡心力依日月之末光瞻攀附而長想大象二年奉  
別勅依儀同例是日勳舊乃被荆棘獨升朝伍彌簡  
帝心及革命從時應期啟運宋昌特拜既可爲儔何  
曾盡禮尤其相匹開皇元年乃授儀同大將軍賜爵  
安養縣子茅土之恩爵頒五等蒲璧之美榮高一代

五年授左武侯車騎將軍八年以本官兼長春宮惣  
監式道之官實須禦侮離宮所幸必資供辦十六年  
授左備身府驃騎將軍十九年改領右親衛府驃騎  
將軍惟左惟右兵欄於是得才或內或外鈎陳以之  
載肅仁壽元年獯粥孔熾控弦犯塞烽火通邊薄伐  
之選非公勿可於是奉詔徂征鞠旅深入結武剛而  
爲陣運衽席以致兵出其不意忽然相接將士用命  
思蹈湯火斬獲不窮遂殲巢穴十一年進授上大將  
軍改封義清縣開國公食邑一千五百戶加地進律  
策勳命賞戶口盛其租入光寵備於朝章三年授左

備身將軍四年以本官檢校慈州刺史事于時晉陽  
構亂妖氣未靜漳滏之寄心膂攸歸公式遏寇虐廓  
清遐邇關河克定趙魏無塵於是黠吏畏威小人懷  
惠龔壯之化諒在茲辰賈卻之風固其慙德大業二  
年授潘州道行軍總管憬彼海隅不遵王略公執鉞  
徧師宣威外闢除其氛沴遐方靜謐三年徵授左武  
衛將軍頃之又授右驍衛將軍升降彤闥駐蹕紫複  
聲稱斯遠朝野穆然其年普班新令官號初改於是  
更授右光祿大夫將軍如故及鑾駕西幸怨其南征  
轍迹所臻方任尤切於是又以本官檢校西平太守壇

場偏隅寇戎接境公道之以德齊之以刑夷狄相趨  
繆絡而至釋冤理訟無勞於鈎距以寬濟猛不行於  
皎察得經邦之妙旨識美化之有由可謂共綏兼稱  
能吏求之古人差無愧色循良之化載暴於天朝修  
短之期奄捐於人事上玄輔善旣已無徵勾芒賜壽  
豈爲誠說某年某月遘疾薨於官春秋五十有五天  
子輟朝不舉追思將帥之臣萌庶罷市相悲同興環  
珞之恨有司考行謚曰某侯禮也惟公早契宏圖夙  
標令問天經地義得之於自然蹈德依仁匪由於傍  
習廉潔不私精愼無怠莫窺喜愠罕測堤封履行斯

和所交必信見惡如由己聞善若順流寬裕足以容  
眾矜莊可以勵物旣在貴而能降實居榮而好謙爰  
初弱歲洞曉兵略攻取戰勝之機隳城陷敵之勇每  
至營圖却月氣析寒膠矢石如飛旗鼓相望公則雅  
歌臨陣搗扇從戎威稜獨遠隱如敵國加以終始一  
心駐馳兩代遂經征討屢典軍人去必見思居常稱  
職故能服冕乘軒獨榮當代擁旄杖節垂譽後昆豈  
非斯人之秀士有國之良翰而道長運短零落無時  
一喪名賢同悲殄悴卽今十一年還葬於京兆郡人  
縣之平原古者王臣之勲必書方策貽厥之義式銘

鍾鼎前志有之足以明鏡言之不可以已其在斯乎  
嗣子人等在家惟孝登朝必聞上弘思親之道傍求  
紀德之事於是刻石宣風永貽相質頌曰

辰昂降精人物之英門多才秀族有公卿永錫流祉  
繼迹揚聲遞駐華轂互委長纓迨茲令肩奇姿挺生  
盛德祀長屬在人良黃中岐嶷青領珪璋如彼鳴鳳  
曜彩朝陽如彼振驚矯翼高翔闔室無怠幽宮獨芳  
心齊竹柏操擬冰霜從橫劒杪遊息文場功參霸業  
策定勤王董司軍要展力遐方式陪蘭綺著蹟衡漳  
勳存賞冊勇冠戎行申威朔野尅定邊荒時逢交泰

運屬重光巡警載肅劬勞以彰出典專城方隅廓清  
屢摧封豕亟翦長鯨一年請借朞月斯成銀黃盛寵  
金爵餘榮悠悠長運促促浮生運龍塹沒送鴈哀驚  
陽陵卜兆洛浹占塋藏舟不固深谷終平死而可作  
惟茲令名

文館  
詞林

隨車騎將軍莊元始碑銘

并序

昔姬文政典司勳詔於旂常魯史策書大夫稱其功  
伐洛師鏤昆吾之銘尸臣鐫栒邑之頌然則紀述庸  
器必候非常之功騰芳彝篆用資可久之德况乃殞  
身殉節捐生立事奮於百代之上裕乎千載之下而

無刊勒者哉公諱元始字長節南郡江陵人也若乃  
執珪思越非重上卿裝金入楚實交窮巷武彊命社  
承助顯於西都會計臨人侍從光於東園冠冕之盛  
可略而言者焉祖山義陽太守父威湘東內史並泛  
涉儒書尤曉兵略威之大父靈福亦守武陵剖符干  
里於此三代公降靈秀發資神挺生爰自髫綺已標  
機悟通家李尹驗其占對可觀卽座顏回歎其風規  
獨遠長而異量雄姿角立傑出苞權豪之遠度蘊將  
帥之奇材長劒搏擊之機短書縱橫之術彎弧蟬翼  
之妙登輦口封之巧有一於此公必兼之仕陳之日

歷官藩府起家宜都王國常侍稍轉內兵參軍屬王  
師伐陳江表初定公奔竄句吳山林屏迹而江湖塵  
亂輕慄合從聞越潛城邑平起公乃避地餘杭志在  
宣力值吳興逆賊攻逼州城梯衝俯臨資援外絕公  
身在窮圍受屈強寇士有飢色人無固心而三令已  
明九距兼設分兵決戰遂翦狡徒一州獲全實公之  
策軍師議賞授儀同三司高智慧作亂吳州同惡相  
濟舳艫亘水旌旗不絕時越國公爲行軍元帥交兵  
浙江雖豹略之機決勝千里而烏集之黨猶思一戰  
公受命軍門先駐銳卒運弱自流而直指搗戈舩而長驚

奇兵電激凶徒瓦解逆豎崩潰分竄海隅公又從元帥輕舟遠襲山谷酋豪應時殲殄水陸阻憑隨方勦定更授上儀同三司就加開府於是乘傳入朝屯衛宮掖恩踰上等禮出舊臣吾彥旣晚入之榮黃權乃從公之貴俄授車騎將軍仍從越國公北伐大俘虜虜振□而歸尋丁湘東君憂哀毀爲疾從權奪禮還攝本軍而獯羯未賓侵擾邊服仁壽元年越國公惣戎出塞公任在後軍復隨莫府故以再從驃騎兩出定襄屬伯初於偏師隱子顏於敵國及大軍轉戰結虜縱兵砂礫風飛矢石雨下公潰陳深入輕騎獨先

利劒之所奮擊長戈之所仆斃莫不膏潤野草屍橫  
亂麻辨髮裹旃扶傷救死銳氣騎賊臨難忘身殞於  
虜陣春秋卅有六天子聞之臨朝不舉乃詔曰車騎  
將軍元始氣幹標勇襟神果毅情深爲國志在忘生  
竭力戎行功立身殞興言壯節有悼於懷宜追加榮  
位用申賞典可贈上天大將軍喪事隨由資給仍以  
本官開府迴授適子永興有司考行謚曰剛子禮也  
惟公早叶英風夙標遠槩資德率禮履信基仁出言  
爲九鼎之貴恤患輕千金之產聿平立勳江外位穆  
台階肅恭奉上廉潔御下故能竭誠邊幕流勸宸襟

使者降敎哀之榮冊書隆加命之典豈非忘生蹈義  
臨色盡節者哉以今年三月六日葬於涇陽之神  
狐里阡臨京兆地擬德陽五校發饒歌之軍十里開  
賜塋之所博陵官屬尙惆悵於王沉謁者護喪實流  
連於鄧訓僉以陳君物範且勒潁川之碑張氏李廉  
猶書冠軍之碣况乃勵茲近俗振我清風節士慕義  
懦夫成勇言之不可以已其斯乎乃刊志清徽樹之  
神道俾夫披文相質知皇代之有人焉銘曰

梁楚華胄卿相高門俛拾青綬奕葉朱幡祖考積德  
踵武洪源洪源寔長有此人良斲年岐嶷綺歲珪璋

高風凜凜逸足昂昂馮九百封披書五行賜璧遊趙  
明珠入梁宗京黍稷舊社淪亡獨往攸貴自得爲塲  
吳越輕心寇賊交侵連衡浙右阻亂稽陰我有奇策  
偏軍卒臨良圖外斷英勇內沉轉鬪千里觀機七擒  
台儀已峻帝寵尤深麾下騎士兵屯羽林權烽夕照  
絕幕從戎登蛟氣憤躍馬心雄腰橫楚劒項縱秦弓  
酣戰力屈長驅路窮傷情邊塞結悼神功策命追遠  
絲言飾終哀榮禮備贈賙恩隆蟻結將掩龜謀已同  
旌旒照日鐃鐸含風誰言不死貴在銘功

同上

左屯衛大將軍周孝範碑銘

并序

若夫聖人有作寶厯應期賢傑於是降生叶贊以之  
同德望方邵而長想超韓白而高步弼成久大之功  
負亮邦家之業騰芳前古垂裕後昆身與朽壤同弊  
名隨鍛帛俱遠俾無愧色其惟譙敬公平公諱孝範  
汝南安成人也姬水降祥惟王於是建國周原命氏  
因生以之賜姓積德綿遠厯載悠長公侯繼及袞袞  
重映主射雄辯頌美於秦君絳侯質直終安於劉氏  
宣光之竭心士位子隱之勵節邊疆自斯已降可得  
而言者也曾祖某梁散騎常侍太子左衛率廬河二  
州刺史保城肅侯早標譽望雅有幹局用能杖節擁

旄樹功立事祖陳車騎將軍都督八十二鎮諸軍事  
定安二州刺史武昌壯公張幕臨戎褰帷作牧殊勳  
表於甲令茂賞盛於惇史父某隨大將軍使持節永  
桂雲三州惣管卅一州諸軍事左武衛將軍譙僖公  
舊德非遠汗竹紀於聲芳遺愛所存甘棠表其歌詠  
自保城著績武衛安邊宣條千里於此三葉繼踵方  
牧時論榮之公惟岳降生含章秀出湛機神而內融  
肅牆宇以外峻因心本孝之義發自天資率由立身  
之道匪因傍習姿貌瓌傑容止方嚴穆乎苞不測之  
量毅然有難犯之色兵書軍志雖不學於孫吳嘉謀

遠算自追蹤於衛霍弓矢盡蓋延之妙騎乘均王濟  
之功州閭推其敬讓宗戚歎其淳厚美譽所歸獨高  
茲日隨大業三年起家齊王典籤其年授交阯郡司  
倉書佐趨職藩庭出臨荒裔冀北之步雖涉於康衢  
圖南之舉未申於寥廓于時炎精已季亡徵將兆公  
卷舒其德沉浮體命殆均亭伯遂遠出於遼陰更似  
文休亦竄身於外寓及皇明革運品物咸亨越自遐  
方歸于京城主上昔在維城任隆分陝撲燎原於鍾  
岱止橫流於溟渤遠求時彥用清中夏公亦推誠霸  
主委質興王附翼之機因搏風而自遠縱鱗之致與

委水而爭擊武德五年授秦王府右庫直車騎將軍  
君右之舉諒侯勳賢折衝之任乃昇帷幄公之此選  
寔允得人九年六月改授太子右內率仍檢校北門  
諸仗宮率精兵見稱厯載儲闈禦武尤光顯職奉雞  
戟以趨侍肅龍樓而巡警其年授千牛將軍封宜春  
縣公食邑一千戶地擬封君榮超戎秩將軍之禮寵  
賜比於命卿建武之選名號隨於制敵貞觀元年授  
右屯衛將軍於立武門領兵宿衛仍以本職出使北  
藩宣楊國威曉諭邊俗班奉四條之書肅清萬里之  
外使還又領立武門內左右厠仗肅鉤陳於中禁排

閭闔而上征羊祜之握兵機典韋之統軍帳任寄之  
重恩私罕匹五年轉授左衛將軍襲爵譙郡公加邑  
二千戶乃司欄錡奄有茅賦象賢光於繼及承基盛  
其土宇六年以本官檢校殿中監事公累昇顯秩所  
在勤官故能入司武職兼惣文吏人資才幹任華宮  
省公勵精爲政見稱明察七年與駕幸于九成天駟  
觀風屯警尤切神居所寄桂杼斯重乃與左僕射立  
齡同掌樞禁昔漢后出征馬防留後魏帝巡幸徐宣  
統兵方之往賢足稱連類公勵志竭誠言則不隱嘉  
謀讜論知而必爲中旨勞問寵賜優洽旣舊抱疴恙

遂掩氣序爰如邁疾載迴天睠於是加授左屯衛大將軍封爵如故方且羽儀當代獎鑒具僚成大夏之棟梁濟巨川於舟楫而夜臺忽掩朝露已稀未勒寶憲之山遽終畢萬之躡七年薨於京師天子爲之輟朝追悼者良久乃贈工部尙書餘並如故有司考行謚曰敬公禮也惟公誠量明遠風神爽發蹈德無怠率禮不違潔操乃出於冰霜貞心有踰於金石至於鄉閭之教規範之言石慶愧其餘風王昶慙其家法非典謩之書弗尙非忠信之言弗踐輕劉德之貨財重季布之然諾終始一心涉厯三代口絕臧否行無

玷缺加以長於武藝妙識兵機金壇奇正得之於懷  
抱玉鈐攻取無勞於積習祭遵儒術未足方其雅歌  
曹仁智勇纔可用其勝口自臨戎御眾莅政當官節  
約以檢其身寬和以接其下不矯飾以招譽豈乾沒  
以徇私在公必聞奉上無隱焚書草而方奏問溫樹  
而不言趙武之情留管庫晏平之祿及朋友而立化  
旋促芳塵不追投竿致其掩泣下機所以流恨豈非  
有始有卒立功立事者哉卽以其年永寔於萬年縣  
之某所三河甲士還陳出塞口容五校饒歌猶奏旋  
軍之曲峴山之拜彌懷於舊思原氏之阡更開於新

道公早著款誠夙展勤効沛公初起蕭何舉宗而有  
歸晉祚肇基何曾在朝而盡敬故能特昇爵位偏隆  
寵渥書社千室享祿萬鍾曲旃雄戟之重文軒銷弩  
之貴當代近臣罕出其右薨徂之日朝野興悼恩加  
上隴禮備哀榮爰命有司立碑隧道昔者西漢殊功  
唯頌美於充國南宮舊事止畫像於仲華未有勒茲  
丹字旌斯玄兆發自睿衷永貽相質天古地久與時  
代而長存石散金銷隨風猷而共遠同夫庸器之典  
兼取雕戈之義銘曰

縣縣姬緒弈弈幽風克纂遙胄惟茲懋功家承台袞

人出才雄祖考載德勲庸在躬是爲人譽復紹名公  
盛業長祀猗歟積慶誕斯明哲實標英令孝資□感  
仁由天性潔比清冰皎同懸鏡藩庭入仕水鄉從政  
勇冠秦隴聲馳函洛譽美遐外績宣臺閣運逢霸道  
時惟聖作乃司禁衛兼謀帷幄寵越等倫恩踰藩岳  
天爵期重時榮已隆是惟顯職兼司禁中竭誠奉上  
捐私徇公勵行無怠當官匪躬文能附眾武實收功  
人擅榮寵族華卿相迺求懿德惟人之望職重中軍  
名超列將摧梁奄及偉才長喪油素傳芳丹青表狀  
逝川不息拱木行陰猶迴慈悼尙結神襟恩加陳席

寵越遺簪追榮惣洎策贈交臨化運長往空嗟德音  
百身靡贖千載猶生沒貴無朽唯茲令名銘開古石  
地上新塋年代滋遠巨陵或不瞻言芳烈永樹風聲  
同上

褚遂良

全唐文一百四十九有傳

請厚諸弟奏

卽日內外官人諸王僚佐咸云陛下供給皇弟頓少  
於親王大臣深知形跡不奏私說竊語殊非光益臣  
伏惟聖主奉義天心豈不恐其多財縱溢或至自敗

必不得積貨驕盈寧使儉急不足雖不比於皇子亦須微允物望臣是以謹訪荆韓漢魯四弟自足資財滕密霍道四王尤爲缺少臣於芳春殿冒以奏聞伏惟天明必記臣語若厚於諸弟人皆聞見六月四日詔便是至公若供給諸弟事皆儉陋卽似叔季昆弟由是情薄臣是以不避斧鉞更敢陳聞昔漢明帝每賜子弟必語羣臣云不得使朕子多於先帝子美哉斯言王者德音終後漢皆以明帝爲法臣聞君施教令謂之風人隨上行謂之俗陛下厚於諸弟太子亦厚於諸弟相承恩篤豈不美哉伏惟陛下疑闕短者

因而賜之所用不多德音流布

唐會要  
五十四

諫昭陵建造佛寺奏

關中既是陛下所都自長安而制四海其間衛士已  
上悉是陛下爪牙陛下必欲乘釁滅遼若不役關中  
人不能濟事由此言之理須愛惜今者昭陵建造佛  
寺唯欲早成其功雖云和雇皆是催迫發遣幽州已  
北岐州已西或一百里或二百里皆來赴作遂積時  
月豈其所願陛下昔嘗語宏福寺僧云我義活蒼生  
最爲功德且又今者所造制度準禪定寺則大宏福  
寺自不可大於宏福既有東道征役此寺亦宜漸次

修營三二年得成亦未爲遲

唐會要  
四十八

論任杜淹奏

貞觀初杜淹爲御史大夫檢校選事此人至誠在公  
實稱所使凡所採訪七十餘人比並聞其嘉聲積久  
研覆一人之身或經百問知其器能以此進舉身旣  
染疾伏枕經年將臨屬纊猶進名不已陛下悉擢用  
之並有清廉幹用爲眾所欽望大唐得人於斯爲美  
陛下任一杜淹得七十餘人天下稱之此則偏委忠  
良不必眾舉之明效也

唐會要  
七十四

王氏帖

臣遂良奉五日勅賜觀陳元慶所王氏寄山東書二百七十三字雖有齊梁著錄永和末其非決矣且連城光景殊絕於武夫芝蘭之芳豈蕭蘭而可雜旣經闕二而其年月不合蓋安石太和之元未厯中書王宰宰之去郡乃聖覽宣俟臣言明恩不遺辯列萬一侍書臣褚遂良謹上汝帖

道妙帖

遂良頓首得六月八日報書聞塗中侍奉安佳爲慰道妙近還至東畿氣體小不宣承與醫療療卽平復彌深感尉遂良自南遷以來每思白首之年孤奉國

恩觸事成悲何言可喻因高崔二姪歸白此褚遂良

再拜

同上

杜正倫

全唐文一百五十有傳

釋法護葬銘

伊昔承恩誨深提耳及茲展覲慟興牀几頽泣可援  
沉嗟靡已庶在遐齡永陪高軌

續高僧傳十五

岑文本

全唐文一百五十有傳

唐故特進尚書右僕射上柱國虞恭公溫公碑

昔者帝嬀升歷九宮奮其庸有周誕命六卿揚其職  
國鈞摠於公相贊乎二輔極密歸於臺閣成乎百官  
滄雅雖被于宋寮勳庸特銘于鍾鼎是以功高魏趙  
詒比高猷此煬帝載其盛德建武嘉其卓操也若夫  
昂宿麗天感其靈者人傑嵩嶽鎮地降其神者國禎  
叶□夢於龍影作□器於舟楫其資也超庸器于陶  
窳而其操也堅貞心于金石此又豈虛譽哉抑功  
無復加也矣公太原祁人諱彥博字太臨系姬文之  
遠胄派唐叔之遙源食邑河內世功開其緒著姓晉  
陽世德派其祚雖曰安國名震于寰中而實持世之

大義獨賔于天下世之勳烈未直著于眾□□蓋猶  
培塿之望岱華潢汙之讓河海祖裕魏太中大夫言  
爲准的行成表綴廊廟翹首搢紳結轍仿公叔而比  
德頡思行而並馳風追赤芾使重皇華隨贈司馬皇  
朝贈魏州刺史聚螢勵學夢鳥成文名冠海中望隆  
日下孔門密子聲華不顯於當時潁川陳君哀榮無  
聞於異代能兼之者不亦優乎公建兩儀之功勳垂  
百世之懿德窮節義以明之敦禮讓以行之故內疚  
常懷外防自維具耿光□遠識所以知其洋洋焉若  
洪河之東注巖巖焉猶華岳之西峙若乃三德六行

列聖之所重也舉錯必踐其域陳疏裕略先賢之所  
難也□報恩闕庭建侯疆圉□風□之奇樹雲蜺以  
達命淪湮者而能與則高臺凌霄始於覆簣長江維  
地肇白涓流是以平津筮仕由賓王而佩印文終創  
業皆名吏而命禮昭著雅範同符前列宏開粵義太  
啟崇席奉詔啟復舊職乃以關內史用于是隆令德  
而依仁當朝碩望士如薛道衡文宗□肆牢籠多士  
太子洗馬李綱直道正辭羽儀海內並下堂見禮倒  
屣定交而遂相稱莫逆遠來能□趙孟之詩近悅能  
追成季之勳留心義化處衡岳則奏疏章輔善謹言

坐宣室而悅道誼乃授通事舍人歛笏鳳池垂紳鸞  
閣環姿月舉韶音玉振每至文武在列華裔近庭對  
越于青蒲之地歛抑于丹墀之所倍□龍光漢苑內  
之杞梓亦卽洪濤中之砥柱以方其對斯乃□賢□  
餘慶具□之□隅猗歟雅度在乎經國大業之始以  
親喪去官孺慕之感哀毀之極與夫長孫居□乎龍  
性疾□其□而□歸嗣以奪情起復舊職煬帝巡歷  
時□代逆而輪轉無時公記勦書功不惑規矩邊徼  
寧謐後或斛斯政出奔高麗旣而乘轅南反詔公銜  
命蕃境申明臣節陳之以逆順曉暢皇威喻之以禍

福遂致蠶茲芳亞威能以□心□以紕密□蓋□返  
西日之戈夷庭去焚巫之刑豈如郭公申禮□旋於  
遼海張騫擁節無功於月氏又以公爲東北道招慰  
大使屬天地橫潰華戎版蕩□□牧野郊原□祥之  
師費□尊□無常難之臣我高祖定四方面□震乘  
六龍而御天憑依握乾坤之符播越遷夏商之鼎艾  
枝銀章弓旌先於髦俊建社班瑞光寵屬於勳庸庶  
績所以成凝羣王然後就列迺以公能扶危拯難特  
授總管府長史轉授侍御公迺遞而進非忠義之報  
也哉雖連接總其方盛光能班其政刑而滅沒不羣

豈蹉跎於吳阪清越振響終特達於章臺徵爲中書  
舍人遷中書侍郎昔周建選遠邇懷歸一時屏藩肯  
比事書賢國家鄉校盡德行道藝之選其歷政則清  
口傳美于岐西而其得人則孝若飛聲於洛下云詛  
嗣響復在茲焉屬獫狁縱匿疆場大駭甘泉迷龍煙  
之火雲衢列象燧之陣口神武之所前向履滿于皇  
躬鞠于朝韜鈴素懷實干城之將琴書在御仁甘瑜  
之臣乃以公爲行軍長史十萬之師方絕大漢五餌  
之術必繫單于而南風褰律載之弘北揚肆豺狼之  
毒衛尉超奇復設口口剪口敵而口能謂口口之難

施故困留于遼海焉皇上嗣堯亮工繼文治宇故蕩  
瑕滌□澆俗侔於結繩叶和萬邦遠夷同於編戶威  
懼龍瀚澤浸龜沼□寶無俟于方域也而使敵者舉  
被渥澤褒其勁節故嘉鄭生之說齊召士季而返晉  
拜公爲治中檢校吏部侍郎尋以副郎□遷御史大  
夫公望爲時宗才稱王佐鴻翼所漸自回溪而薄九  
霄驥足旣馳遊閭閻而騁千里雖信勇並宿乃□斯  
靈道□術□地者莫無辭焉□議誠□□□閭糾  
謬爲於大選陳議武□渥洽歸□□□故能爵命日  
隆寵祿歲厚猶司馬之四至慈明之十旬乃以□官

拜太子右庶子遷御史大夫仍給事中書侍郎遷中書令志矢蹇蹇望重巍巍建大義于廊廟陳諤言于闕庭在位幾載獨寵冠百僚職司八柄公又處之故能出摠紕察入專機管執簡冊以肅周行奉絲綸以光帝業朝夕靖獻出納厘隨會之忱遠邇聞風始終念蘇武之節豈其猶人歟俄而勳銘衛鼎功紀徐陵故晉封虞公復食邑三千戶德優爵重鎬京之舊制非功不侯中陽之令典踰七命而兼二善天下以爲公之北征而佩命南旋口屬節酬庸寵錫其由來者漸矣斯旬宣而盡其方伯之職僕射而踰于副相之

位上圖天道如斗極之運四時下料人事邁元愷之  
贊百揆聖朝欽若前典憲章往代懷礪溪而縈夢想  
嘉□國而勵堅貞非公之礪礪不屈介介不苟結主  
知於艱危之際臨事而不懼哉觀東道之通返南宮  
之政實心體道勤行而不倦歷選前哲仰止而無怠  
是以忠允寬裕懷內恭之溫溫虛列著之抑抑謹度  
習儀自叶巽貞之吉盡忠補過不忘前惕之勤損茲  
驕盈戒其徧辟夙夜匪懈以事一人獻替之規不忘  
於忠恕損益之義皆出於仁厚違規矩枉尋尺光其  
家而弗爲利社稷安□兆危其身而無悔肅肅焉濟

濟焉宛若猶龍之持已仁以立之義以行之更如於菟之毀家慎動言于公庭卽執信義爲國柄心之所同必擇善以利物意之所異不是已而違人闢德義爲宮牆包禮度爲開闔勸人之善行勵人之清操閑人之邪思規人之匪彝善辭令而絕毀譽繩愆謬而篤德義位高矣持以慈和祿厚矣治以儉約以孝敬之道移於哲兄行慈惠之心洽於猶子允所謂朝廷之棟幹家門之橋楚焉以貞觀十一年春奉命巡察道出洛陽駐旌遁疾以動寄深□□□恩篤股肱之□載口碑于道路名□□陳其方技遂輔德愆報

彌留曠旬兩楹之奠旣兆二豎之灾乃□詔遣銀青  
光祿大夫行中書侍郎杜正倫撫視疾體並簡詒謀  
乃公志存忠□表陳治道愼忽之幾□盡□□之德  
著者□卿大漸無□忘於舉能子顏啟足情存於愼  
赦眇焉千載於斯一揆六月廿日薨於旌陽□賢里  
官第春秋七十有□□□□□□□□之□□類  
齊后之□□□□□□□□卽以其日□□於□陵□□  
□百寮倍列莫不流涕乃詔民部尙書莒國公唐儉  
工部侍郎盧義恭護喪行中書侍郎杜正倫持節吊  
祭遣禮部令狐綦水部郎中□文紀持節冊贈尙書

石僕射上柱國謚曰恭公勅令立碑紀德卜塋地於  
昭陵之側并給東園祕器賻贈二千段喪葬所須並  
令官給予祖送之典墳域之制咸率禮度之宜焉夫  
顯微闡幽義不容辭功高德盛資篆籀之鋪揚聲飛  
實騰載金石以不朽是以定獻忠穆漢室之良佐也  
密陵當陽晉朝之賢輔也雖復卿雲摛思班爾運奇  
勒銘由其子孫表墓資于寅僚紀奕葉之作述敘國  
楨之挺生故史冊發乎幽光而綸詔追乎往載不甚  
偉歟武湯一德垂之百代其詞曰

藹藹高門世膺顯命堂堂盛德家襲餘慶抗節飛英

扶危流詠軒蓋接連圭璋輝映操凌張裔勳高趙孟  
獨飾朝綱屢持國柄露布馳聲循牆示儆出險入危  
風疾草勁鼓篋窮經超藝絕德裁成呂鍾範圍儒墨  
非馬擅奇雕龍貽則發跡素里馳聲上國仲舒揚庭  
吾丘侍職數厯屯邇不遑同口口是正直待後守先  
和璧韞石隋珠輝川伊呂之佐堯舜之年頗韻往節  
伯仲前賢受書圯上釋鈎滋泉陳謨德顯定策功宣  
縱壑纔驚搏風初矯密勿鸞閣便繁鳳沼仲舉性純  
伯遺性信立我楷模示我儀表萬古青霄千秋丹旂  
泉儀維則衣德堪紹嗚呼忠忱懷思渺杳屢遭艱厄

卷之五  
三  
□逝良弼鑄冊義府傳薪理□水逝黃陂光沉趙日  
稅駕天府夷體泉室麟閣圖形烏台騰實悲纏奄息  
慘懷尹始永叨恩隆垂裕貽輶維地河山□天箕畢  
懿範昭茲德音洋溢